

REGLUGERÐ

um eftirgjöf á hinu fasta ársfjórðungsgjaldi fyrir venjulegan síma hjá elli- og örorkulífeyrisþegum.

1. gr.

Póst- og símamálastofnun skal fella niður hið fasta ársfjórðungsgjald af venjulegum síma hjá elli- og örorkulífeyrisþegum, með þeim skilyrðum, sem sett eru í reglugerð þessari.

2. gr.

Umsókn um niðurfellingu ársfjórðungsgjalds skal vera á sérstöku eyðublaði, réttilega útfylltu og undirrituðu. Eyðublöðin skulu afhent ókeypis í starfsmannadeild Póst- og símamálastofnunar og á póst- og símastöðvum.

Allar slíkar umsóknir skulu sendar starfsmannadeildinni, sem kannar aðstæður og afgreiðir málið síðan, sé skilyrðum reglugerðar þessarar fullnægt.

3. gr.

Skilyrði til að ársfjórðungsgjald megi fella niður eru:

- a) Að viðkomandi elli- og örorkulífeyrisþegi njóti óskertrar uppbótar á elli- eða örorkulífeyri (tekjutrygging), samkvæmt 19. gr. laga nr. 67/1971, um almannatryggingar.
- b) Að umsækjandi búi einn í íbúð, eða sé hann í hjónabandi eða öðru sambýli, þá uppfylli hver einstaklingur kröfur reglugerðar þessarar.

Umsækjandi telst þó uppfylla skilyrði þessarar greinar, ef sambýlismaður nýtur makabóta í stað óskertrar tekjutryggingar.

Jafnframt teljast skilyrðin uppfyllt þótt fólk undir 25 ára aldri dveljist á heimilinu, eða eldra, sem þar hefur ekki lögheimili, enda hafi viðkomandi elli- eða örorkulífeyrisþegi óskerta tekjutryggingu eftir sem áður.

Auk allra almennra íbúða sem um getur í upphafi 3. gr. b). nær grein þessi til dvalarheimila fyrir aldraða og öryrkja, þar sem íbúar annast sig að verulegu leyti sjálfir, enda uppfylli hver einstaklingur skilyrði greinar þessarar svo sem fyrr getur.

- c) Að ekki sé annar sími í íbúðinni.

4. gr.

Heimild til niðurfellingar gjalds samkvæmt reglugerð þessari nær aðeins til hins fasta ársfjórðungsgjalds síma samkvæmt gjaldskrá en ekki til annarra gjalda, hvorki stofngjalda, gjalda vegna umframsímtala, aukabúnaðar, né annarra gjalda en fasts ársfjórðungsgjalds, sem nú eru í gildi eða síðar kunna að verða sett með gjaldskrá.

Rétthafar samkvæmt gjaldskrá þessari skulu hlýta almennum skilmálum um innheimtu símagjalda o.fl.

5. gr.

Þótt réttur elli- og örorkulífeyrisþega til að fá hið fasta ársfjórðungsgjald síma felld niður, sé viðurkenndur, fær hann ekki forgangsrétt til að fá síma umfram aðra umsækjendur.

6. gr.

Skýlt skal rétthafa síma, er fengið hefur ársfjórðungsgjald felld niður, að tilkynna starfsmannadeild Póst- og símamálastofnunar þær breytingar, sem á högum hans kunna að verða og raskað geta forsendum fyrir gjaldfrelsi hans. Misnotkun eða rangar upplýsingar varða missi réttinda samkvæmt reglugerð þessari.

7. gr.

Tryggingastofnun ríkisins lætur Póst- og símamálastofnun ársfjórðungslega í té skýrslu um þá elli- og örorkulífeyrisþega um land allt, sem óskertrar tekjutryggingar njóta, sbr. a-lið 3. gr. reglugerðar þessarar, ennfremur þeirra er njóta makabóta.

Reglugerð þessi er sett samkvæmt 1. gr. laga nr. 24 23. maí 1975, um breyting á lögum nr. 30/1941, um fjarskipti, til að öðlast gildi nú þegar og birtist til eftirbreytni öllum þeim, sem hlut eiga að máli.

Jafnframt fellur úr gildi reglugerð nr. 426 7. desember 1978, um sama efni.

Samgönguráðuneytið, 14. maí 1982.

Steingrímur Hermannsson.

Halldór S. Kristjánsson.

REGLUGERÐ

**um framfærsluaðstoð skv. 2. mgr. 15. gr. laga nr. 47/1979
um aðstoð við þroskahefta.**

1. gr.

Greiðslur samkvæmt 15. gr. 2. mgr. taka einungis til framfærenda, sem hafa þroskahefta einstaklinga á heimilum, yngri en 16 ára.

2. gr.

Greiðslur samkvæmt 15. gr. 2. mgr. gilda einungis fyrir þroskahefta einstaklinga, á aldrinum 1 árs til 16 ára, sem einungis dveljast í heimahúsum.

Heimilt er þó að víkja frá lægri aldursmörkum ef sérstakar knýjandi ástæður eru fyrir hendi, sem réttlæta slíkar greiðslur vegna barna á 1. ári.

3. gr.

Framfærendur, sem njóta þjónustu dagvistunarstofnana, leikskóla, eða dagheimila, eiga ekki rétt á greiðslu samkvæmt 15. gr. 2. mgr. Sama gildir ef barnið sækir skóla og nýtur kennslu utan heimilis. Þó má víkja frá þessu ef um er að ræða mjög takmarkaða kennslu. Framfærendur eiga því aðeins rétt á aðstoð skv. 1. gr. rgl. þessarar að sannað sé fyrir svæðisstjórnnum og ráðuneyti að þroskaheftur einstaklingur geti ekki notið dagvistunar, skólagöngu, leikskóla eða annarrar opinberrar þjónustu sem fyrir hendi er á svæðinu.

4. gr.

Umsóknir um aðstoð samkvæmt 15. gr. 2. mgr. skulu berast til svæðisstjórnar á því svæði, sem hlutaðeigandi umsækjandi á lögheimili.

5. gr.

Svæðisstjórn skal afla nákvæmra upplýsinga um andlegt og líkamlegt ástand barnsins svo og félagslegar aðstæður framfærenda.

Komist svæðisstjórn að þeirri niðurstöðu að umsækjandi eigi rétt á aðstoð, skal svæðisstjórn senda félagsmálaráðuneytinu (deild fyrir málefni þroskaheftra) umsóknina ásamt öðrum upplýsingum og meðmælum. Ef framfærendur njóta einhverrar opinberrar aðstoðar eða þjónustu vegna barnsins skulu upplýsingar fylgja um það.